



ESKOLA KIROLA IKUSKATZEKO PROZEDURAREN ARAUBIDEAREN FORU AGINDUAREN PROIEKTUA

Eskola kiroleko lehiaketen diziplina araubidea honako hauek osatzen dute: 14/1998 Legea, ekainaren 11koa, Euskadiko kirolarena; 391/2013 Dekretua, uztailaren 23koa, Eskola kiroleko lehiaketen diziplina araubideari buruzkoa; lurralde historikoetako foru erakundeek aurrekoa garatuz emandako araudia, eta erakunde antolatzaileek onesten dituzten diziplina xedapenak.

Aurretik aipatutako lehenengo legeak, hau da, Euskadiko kirolaren Legeak, bere 120. artikuluan xedatzen du lizentziak edo baimenak emateko eskumena duen administrazioak ikuskatuko dituela instalazioak eta jarduerak.

Esandakoaz gainera, bere 122. artikuluan xedatzen du ikuskatzaileak, beharrezko egiaztagiriekin, agintaritzaren agente izango direla, eta indarrean dagoen araudiak ematen dizkien babesaz eta ahalmenaz baliatu ahal izango direla.

Halaber, 123. artikulua xedatzen du kirol zentroetako titularrek eta kirol arloan zerbitzuak eskaintzen dituzten pertsonak edo erakundeek ikuskatzaileei lokaletan sartzen utzi beharko dietela, dokumentuak eta ondasunak kontrolatzen eta aztertzen utziko dietela eta behar den laguntza emango beharko dietela ikuskatze lanetan.

Eskola kirolari buruzko uztailaren 1eko 125/2008 Dekretuaren arabera, Arabako Foru Aldundiak eskumenak ditu eskola kirolaren arloan eta, halatan, 23. artikulua honela xedatzen du: “Lurralde historikoetan kirolaren eskumena duten foru organoek, bakoitzak bere eskumen esparruaren barruan, eskola kirolaren gaineko ikuskatze funtzioak egingo dituzte. Horretarako, eskola kirolaren alorreko lege eta arau xedapenak betearaziko dituzte”.

Esandako artikuluko bigarren apartatuak honela dio: “Kasuan kasu gaitutako pertsonak, dagokien espezializazio teknikoaz hornituta, egingo dituzte ikuskatzeak”.

Ez dira ahaztu behar Eusko Jaurlaritzaren Emakumeen eta gizonen berdintasunerako 4/2005 Legearen 6. artikulua bidez foru administrazioei gizonen eta emakumeen berdintasunarekin lotuta emandako eskumenak. Horien artean hauxe dago: “1) Lurraldean gertatzen diren eta sexua oinarri duten diskriminazio egoerak detektatzea eta horiek deuseztatzeko neurriak hartzea”. Hori guztia Lege horren 25.3. artikuluan jasotako araubidea betez, kirolaren alorrean berdintasuna sustatzeari buruzkoa: “EAEko administrazio publikoek beharrezko neurriak hartu beharko dituzte kirol modalitate guztiak gauzatzean emakumeek eta gizonen tratua eta aukera berdinak jasotzen dituztela bermatzeko”. Printzipio hori 3/2007 Lege Organikoaren, Emakumeen eta gizonen arteko berdintasun eraginkorraren, 29. artikuluan ere araututa dago: “Kirola garatzeko programa publiko guztiak diseinatzean eta egikaritzean emakumeen eta gizonen arteko berdintasun erreal eta eraginkorraren printzipioa jasoko da”.



Azaldutako aginduak ikusirik, eta dauden ikuskatze premiak kontuan hartuz, eskola kirolaren eremuan ikuskatzeak egiteko behar diren bideak gaitu dira, Arabako Lurralde Historikoan eskola kirolaren ikuskatzailtzak bete behar dituen antolaketa eta prozedura arautuz.

Horregatik, eta dagozkidan eskumenez baliatuz,

XEDATZEN DUT

I. TITULUA

XEDAPEN OROKORRAK

1. artikulua.- Xedea.

Foru Agindu honen xedea Arabako lurralde historikoan eskola kirolaren ikuskaritzak bete beharreko antolamendua eta prozedura arautzea da.

2. artikulua.- Eskumena.

Kirol alorrean eskumenak dituen Arabako Foru Aldundiaren Sailak Arabako lurralde historikoko eskumenen alorrean eskola kirola ikuskatzeko zereginak egikarrituko ditu, eta horretarako, aplikatu beharreko legezko xedapenak eta arauzkoak betetzen direla kontrolatuko du.

3. artikulua. Aplikazio eremua.

Ikuskaritza eskumenen barnekoak diren eskola kiroleko elementu eta alderdi guztietan gauzatuko da, eta hori guztia legezko eta arauzko xedapen guztiak betetzen direla bermatzeko, eskubideak bermatzeko eta eskola kirolean parte hartzen duten pertsonak eta erakundeak zereginak betetzen dituztela ikuskatzeko.

II. TITULUA

ZEREGINAK

4. artikulua.- Zereginak.

Ikuskaritzaren barneko zereginak dira hauek:

a) Eskola kirolaren alorrean legezko eta arauzko xedapenak betetzen direla zaintzea eta kontrolatzea eta kirolari aplikatutako emakumeen eta gizonen arteko alorrean indarrean dagoen araubidea betetzen dela zaintzea eta kontrolatzea.



- b) Erabiltzaileek ustezko arau-hausteei eta irregulartasunei buruz egindako erreklamazioak eta salaketak egiaztatzea aurreko atalean adierazitako arloari dagokionez, albo batera utzi gabe beste administrazio publikoek izan ditzaketen eskumenak.
- c) Arabako Foru Aldundiak eskola kirola sustatzeko emandako diru-laguntzak eta laguntzak jasotzeko datuak, hau da, zenbateko ekonomikoa jasotzeko kalkulatzeko erabili zirenak, egiaztatzea eta errealitatearekin bat datozela baieztatzea. Hori guztia beste organoek gauzatu ditzaketen kontrolak albo batera utzi gabe.
- d) Eskola kirolaren alorrean agindu ahal izango diren bestelako zereginak.

5. artikulua.- Ikuskatu beharreko jarduerak.

Ikuskaritza lanak honakoetan egingo dira:

A) ESKOLA KIROLEKO PROGRAMATUTAKO JARDUERAK:

1.- Eskola kiroleko programako honako jarduerak egiten direla egiaztatuko da:

a) Kirol jarduera anitzak:

Garatutako jarduera eta aurkeztutako jardueraren memoria bat datozela egiaztatuko da.

b) Kirol hastapena:

Baimendu denarekin bat etortzea egiaztatuko da.

c) Lehiaketak:

Kategoria bakoitzeko eremu geografikoetako kirolari baimenduek parte hartuta egin direla egiaztatuko da, baita aurretiaz emandako baimenekin bat eginez gauzatzen direla ere.

2.- Kontratutako autobusekin bidaiak eginez gero bakarrik baimendutako ibilgailuekin eta pertsona eskatzaileekin gauzatzen direla egiaztatuko da:

a) Asteazken zehar, entrenamenduetarako baimendutako ibilbideak.

b) Asteburuetan, lehiaketetarako baimendutako ibilbideak.

A) ESKOLA KIROLEKO PROGRAMATU GABEKO JARDUERAK:

1.- Programatu gabeko eta Kirol Zerbitzuak baimendutako kirol ekimenak antolatzeari dagokionez, ekimenak baimenaren arabera antolatzen direla egiaztatuko da. Baimenik ez duten ekimenei dagokienez ukatze ebazpena betetzen dela egiaztatuko da.

2.- Programatu gabeko eta Kirol Zerbitzuak baimendutako kirol ekimenetan parte hartzeari dagokionez, baimena betetzen dela egiaztatuko da. Ukatutako eskariei dagokienez ukatze ebazpena betetzen dela egiaztatuko da.



III. TITULUA

IKUSKATZE EGINKIZUNA BETETZEA

6. artikulua.- Ikuskatzaileak.

- 1.- Foru Agindu bitartez eta Arabako Foru Aldundiaren Kirol Zerbitzuak hala proposatuta, eskola kiroleko ikuskaritza egiteko ikuskatzaileak izendatuko dira. Beste administrazio edo erakunde publikoetako langileak gaitu ahal izango dira horretarako.
- 2.- Ikuskatzaileak funtzionarioak edo langileak izan beharko dira eta Jarduera Fisikoko eta Kiroleko gradua edo baliokidea izan beharko dute, horren bitartez gaitasuna izaten baita ikuskatu beharreko kirol jarduerak baloratzeko eskola kirolaren araubidean jasotakoarekin bat eginez.
- 3.- Ikuskatzaileek ziurtagiriak izan beharko dituzte eta hala, agintaritza agenteak izango dira. Horrenbestez, agintaritza agenteek indarrean dagoen araubidearekin bat eginez dituzten babesak eta eskumenak izango dituzte. Zereginak gauzatzeko beharrezko egiaztagiria eta beren izendapenari buruzko Foru Agindua erakutsi beharko dituzte.
- 4.- Beharrezkoak diren legezko baldintzekin bat eginez aktetan jasotzen diren eta ikuskatzaileek egiaztatu dituzten egitateek ziurtasun presuntzioa izango dute, albo batera utzi gabe interesatuek eskubideak edo interesak defendatzeko aurkeztu ahal izango dituzten frogak.
- 5.- Egokitzen jotzen dutenean eta zereginak hobeto egikaritzeko ikuskatzaileek beste administrazioetako eta erakunde publikoetako langileen eta zerbitzuen lankidetzak eskatu ahal izango dute. Horrez gain, alorrean eskumenak dituzten beste erakundeen informazioa eta aholkularitza eskatu ahal izango dute baita ere. Beharrezkotzat jotzen dutenean, Segurtasun Indar eta Kidegoen lankidetzak ere eskatu ahal izango dute.
- 6.- Gaiakuntzarekin batera kirol alorrean eskumenak dituen sailak ikuskatzaileei ikuskaritza prozedurari buruzko oinarriko informazioa emango die.

7. artikulua.- Ikuskatzaileen eskumenak.

Zereginak gauzatzean ikuskatzaileek eskumen hauek izango dituzte:

- a) Libre sartu ahal izatea, aurretiaz horren berri eman gabe eta edozein unetan, ikuskaritza gauzatu beharreko eskola kirola egiten ari diren zentro eta leku guztietan eta leku horietan egotea, betiere egoitzaren bortxaezintasuna errespetatuz.
- b) Ikuskaritza bisita hastean edo hala badagokio hasi ondoren ikuskatzaileak bertan daudela jakinaraztea. Hala behar denean, ikuskatzaileak une horretan zentroaren arduradun nagusia bertan egoteko eskaria egin ahal izango du.
- c) Bisitan zehar arduraduna edo ordezkaria beraiekin batera egotea.
- d) Aplikatu beharreko xedapenak betetzen direla egiaztatze beharrezkoak diren ikerketa diligentziak, azterketak edo probak egitea.
- e) Ikuskaritzarako garrantzitsuak diren informazioa, datuak edo aurrekariak biltzea eta jasotzea. Informazio hori idatzizko eskakizun bidez jasoko da. Eskariak betetzeko ikuskatzaileek gutxienez hamar eguneko epea emango dute, eta zehaztu egingo dituzte eskatutako datuak, aurrekariak eta informazioa.



- f) Hala badagokio, egokitzen jotzen dituzten kautelazko neurriak eta behin-behineko neurriak hartuko dituzte.

8. artikulua.- Ikuskatzaileen betebeharrak.

Zereginak gauzatzean ikuskatzaileek honakoak egin beharko dituzte:

- a) Interes orokorrak objektibotasunez betetzea eta eraginkortasun eta hierarkia printzipioekin bat eginez jardutea, legea eta zuzenbidea guztiz betez, eta eskumenak dituzten agintaritzek zehaztutako irizpide teknikoak eta zuzentzarauak errespetatzea.
- b) Zereginak gauzatzean eta beraien agintaritzak eta lanak egitea oztopatu gabe, herritarrekiko zuzentasun osoa izatea eta ahalik eta gutxien oztopatzea ikuskatuak jarduerarekin jarraitzea.
- c) Ikuskaritza bisitetan bertan daudela jakinarazi beharko diete arduradunari edo ordezkariari.
- d) Ikuskaritzetan ezagutzen dituzten gaiak sekretuan mantenduko dituzte.
- e) Funtzio publikoaren bateraezintasunen, abstentzioen eta ezespeneen araubide orokorra betetzea.

9. artikulua.- Ikuskatutako erakundeen betebeharrak.

- 1.- Ikuskatutako erakundeek ikuskatzaileek beren lana zuzentasunez egiteko beharrezko laguntza emango dute.
- 2.- Kirol zentro eta erakundeetako titularrek eta eskola kirolean lan egiten duten pertsonak eta erakundeek ikuskatzaileei instalakuntzetara sartzen utzi beharko diete eta agiriak eta ondasunak kontrolatzen eta aztertzen utzi beharko diete.
- 3.- Ikuskatzaileek ikuskatuak bertan egotea eskatu ahal izango dute, edo ikuskatuak bertan ez baldin badaude administrazioan ordezkariak gauzatzen dutenak. Hori guztia ikuskaritza diligentsiak egiaztatzeko izango da.

10. artikulua.- Ikuskatze jarduketa.

- 1.- Ikuskaritzaren helburua gertakariak egiaztatzea da, eta horretarako beharrezko informazioa eta datuak biltzen dira. Horrenbestez, ez da balio judiziorik eta/edo presuntziorik egingo. Ikuskaritzak ofizioz jardungo du jasotako agindu baten ondorioz, hau da, beste organo batzuk egindako arrazoitutako eskariaren ondorioz, norbere ekimenez edo salaketa bat egon delako.
- 2.- Ikuskaritzak honela egingo dira:
 - a) Nagusiki ikuskatu beharreko zentroetan edo lekuetan egingo dira eta ez dute halabeharrez aurretiazko jakinarazpenik eman beharko. Ikuskaritza bisitak ikuskatzaile batek edo zenbaitek gauzatu ahal izango dituzte eta ikuskaritza lanak egiteko beharrezko denbora guztia hartuko dute.
 - b) Derrigortasuna duen jardulearen ikuskatzaileari egindako agertze eskariaren bitartez ere egin ahal izango dira, kasu bakoitzean adierazitako agiriak aurkeztuz eta beharrezko azalpenak emanez.
- 3.- Era berean, ikuskaritzak administrazio publikoetan dauden datuak edo aurrekariak egiaztatu ahal izango ditu. Horretarako, beste administrazio publikoek emandako datuak edo aurrekariak baloratu ahal izango dituzte.



4.- Egiaztaketa jarduketek ez dute hiru hilabete baino gehiago iraungo, salbuetsiz atzerapena ikuskatuari egotzi ahal izatea edo administrazio lankidetzat falta izan delako sortu izana. Inguruabar horiek administrazio espedienteetan jaso beharko dira. Era berean, jarduketa horiek ezin izango dira justifikaziorik gabe hilabete baino gehiagoz eten edo gelditu.

5.- Ikuskaritza batean egindako egiaztaketak aurrekariak izango dira hurrengo ikuskaritzetarako.

11. artikulua.- Salaketagatik ikuskatzen hastea.

1.- Salatzaileak ezin izango du eskatu interesdun izaeraz jokatu ahal izatea ikerketa faseen ondorioetarako, baina hala ere, salatzailea interesduna izango da dagokion zehapen espedienteetan hasten baldin bada.

2.- Ez da izapidetuko salaketa anonimorik, ezta ere eskola kiroleko ikuskaritzak zaindu behar ez dituen alorrei buruzko salaketarik, arrazoitu gabekorik eta organo jurisdikzionaletan jorratzen diren gaiekin bat egiten duenik.

12. artikulua.- Aurretiazko informazioa jasotzea.

Ikuskaritza egin aurretik ikuskatu beharreko jarduerari buruzko datuak eta informazioa jasoko dira, bestek beste hauek:

- a) Izen-emateak: erakundeen, klubuen, taldeen eta parte-hartzaileen datuak.
- b) Entrenamenduetako eta lehiaketetako egunak eta orduak.
- c) Entrenamendurako edo lehiatzeko lekuak.
- d) Beharrezkotzat jotzen diren beste batzuk.

13. artikulua.- Ikuskapena gauzatzea.

1.- Ikuskapenak ohikoak izango dira horien helburua urteko planifikazioko zereginak egikaritzea denean, eta ez ohikoak izango dira ofiziozko urteko planetik kanpo edo alderdi batek hala eskatuta gauzatzen direnean.

2.- Ikuskaritza arrazoiarekin bat eginez, eta albo batera utzi gabe programatuta egotea, hirugarren batek eskatuta hasitako urteko planifikaziotik kanpokoa izatea edo ofiziozkoa izatea, ikuskaritzan honako alorrak jorratuko dira:

- a) Ziurtatu egingo dute jarduerak araututako eskola-kiroleko egutegietan adostutako egunetan egiten direla.
- b) Indarrean dagoen eskola kiroleko programan jasota ez dauden jarduerari dagokienez beharrezko baimena dutela egiaztatzea.
- c) Jarduera eta jardueran parte hartzen dutenen adina eta parte-hartzaileak identifikatuko dituzte: taldeak, arduradunak edo pertsona edo erakunde antolatzaileak eta identifikaziorako kirol arropa.
- d) Astero baimendutako edo adierazitako baino entrenamendu gehiago edo gutxiago egitea egiaztatuko dute.
- e) Indarrean dagoen eskola kiroleko programan izena emandako ikasleen zerrendak ikuskatutako jardueran parte hartzen ari direnekin bat egiten duela egiaztatuko dute.



3.- Zentroan edo ikuskaritza lekuan daudela, ikuskatzen ari diren jardueraren arduraduna identifikatuko da eta jakinaraziko zaio ikuskaritza egiten uzteko betebeharra duela, eta esango zaio ikuskaritza egiteari uko eginez gero edo ikuskaritza oztopatuz gero zehapenak ezarriko zaizkiola, zehapen horien nolakotasuna ere adieraziz.

4.- Ikuskaritzan jasotako informazioa eta datuak ikuskaritza aktan jasoko dira, eta akta hori ikuskatzaileak eta arduradunak sinatuko dute.

5.- Ikuskaritza hasi ondoren horrekin jarraitzea edo bukatzea ezinezkoa denean ikuskatuak eskatutako aurrekariak edo agiriak eman ez dituelako, jarduketak jarraitu egingo du agiri horiek emateko eskariarekin bat eginez.

6.- Ikuskaritza bat baino gehiago egin behar izanez gero, ikuskaritza bakoitzeko akta bat egingo da.

14. artikulua. Ikuskatze akta.

1.- Gaitutako ikuskatzaileek egiaztatutako egitateak aktetan formalizatuko dira 39/2015 Legearen, urriaren lekoaren, Administrazio publikoen administrazio prozedura erkidearen, 77.5. artikuluan aurreikusitako ondorioetarako, eta kontrakorik frogatu ezean ziurtasun printzipioa izango dute.

2.- Aktetan gutxienez hauek jasoko dira:

- a) Ikuskatutako instalakuntzaren eta jardueraren identifikazio datuak.
- b) Ikustaldiaren eguna eta ordua.
- c) Ikuskatutako jarduera antolatu duen erakundearen eta/edo kirol klubaren datuak.
- d) Ikuskatutako jardueraren zuzendarien edo gainbegiratzaileen datuak, entrenatzaileak, monitorea edo langileak diren adieraziz.
- e) Kirol instalakuntzako titularren edo titularren datuak eta ikuskatutako jardueraren ordezkariarenak, bertan egonez gero.
- f) Ikuskatutako jarduera lehiakorra baldin bada, antolatzaileak ez diren kirol erakunde eta/edo klub parte-hartzaileen datuak eta gainerako taldeen eta taldekideen datuak.
- g) Egiaztatutako gertakariak.

3.- Aktak ikustaldian egondako jardueraren arduradunak sinatu beharko ditu. Aurretik adierazitakoek akta sinatzen eta jasotzen badute horren jakinarazpena egingo da, baina ez da halabeharrez aktaren edukia onartuko.

4.- Pertsona horiek akta sinatu nahi ez badute, ikuskatzaileak horren berri emango du diligentzia bidez, eta haiek adierazitako arrazoiak idatziko ditu. Egindako aktaren kopia emango zaio ikuskuari, eta aktaren jakinarazpen ondorioak indarrean jarriko dira.

15. artikulua.- Ikuskatze txostena.

1.- Ikustaldia edo ikustaldiak egin ondoren Kirol Zerbitzuak ikuskaritza txostena egingo du, eta bertan hauek jasoko ditu:

- a) Aurretiaz bildutako informazioa.
- b) Ikuskaritza aktan edo aktetan egiaztatutako gertakariak.



- c) Jarduerari buruzko informazioa ematen duten gainerako frogak.
- d) Ikuskaritzaren ebazpen proposamenak, hauetako bat:
- Eskola kirolaren araubidearekin bat egiten duena.
 - Titularrak, bere ordezkariak edo langileek ikuskatzaileen lana oztopatu izana jasotzen duena.
 - Jakinarazpenekoa, eskakizunak bete ez direnean edo erraz zuzentzeko irizpideei buruzkoa denean, eta betiere horietatik hirugarrenentzat kalte edo galerarik sortzen ez denean. Jakinarazpen txostenean aplikatu beharreko araubidea eta betetze epea jasoko dira.
 - Zehapenekoa.

2.- Txostenetan ez dira zehapen proposamenak jasoko, eta txostenak egin ondoren ikuskatutako jardueraren arduradunari bidaliko zaizkio.

3.- Eskakizunen ez betetze arinak edo erraz konpontzeko akatsak egonez gero, Kirol Zerbitzuak ikustaldi berri bat egitea aginduko du, eta ikustaldi berri hori okerrak zuzentzeko epea igaro ondoren gauzatuko da. Bigarren ikustaldi horren emaitza dagozkion aktan eta txostenean jasoko dira, eta ebazpen proposamena ere jasoko da ikustaldiaren emaitza eskola kirolaren araubidearekin edo zehapen araubidearekin bat baldin badator.

4.- Konpondu daitezkeen zehapen egitateak detektatzen baldin badira dagokion zehapen prozedura hasiko da.

IV. TITULUA

IKUSKATZE JARDUNAREN PLANGINTZA

16. artikulua.- Eskola kiroleko ikuskatze jardunen urteko plangintza.

1.- Eskola kirolaren ikuskaritza zereginak dagokion planifikazioaren bidez egikaritzea urtero aginduko da, albo batera utzi gabe planifikazio horretatik kanpo egin daitezkeen jarduketa espezifikoak, bai ofizioz edo salaketan ondorioz.

2.- Urteko planifikazioan zehaztuko dira lortu beharreko helburuak, ikuskaritzaren xede materiala, edukia eta iraupena, hau da, ikuskaritzaren hasierako eguna, garapen faseak eta ikuskaritza jarduketan bukaera.